



Era cun la lescha revedida na vegnia quai a dar nagins sforzs da vaccinar.

KEYSTONE

Betg starment da vaccinaziuns sfurzadas

■ **(anr/vi) Il pievel svizzer beneventa la lescha d'epidemias. Ils adversaris discurran d'in cumbat da votaziun sco tranter David e Goliat.** Ils votants hajan chapì che la lescha vertenta na correspundia betg pli als basegns dad oz, ha ditg cussegliera naziunala *Ruth Humbel* (pcd/AR) ier en ina discussiun sin radio DRS. Era cun la lescha revedida na vegnia quai a dar nagins sforzs da vaccinar. L'obligatori da vaccinaziun saja restrenschì sin tschertas gruppas e sin situaziuns particularas. Epidemias na fetschian betg halt als cunfins chantunals. Perquai saja necessaria ina coordinaziun federala en cas d'epidemias. Quai hajan ils chantuns gjavischà.

Il cumbat per questa votaziun saja stà sco quel tranter David e Goliat, ha ditg cussegliera naziunala *Yvette Estermann* (pps/LU). Quasi tuttas partidas, il parlament ed il cussegl federal sajan s'engaschads per la lescha e mo la pps ed intginas gruppaziuns pitschnas hajan fatg frunt. Tuttina na sa sentia ella betg sco sperdidra, di Estermann. «Il temp vegn a mussar tgi che ha pers.» Il pievel haja ditg gea ad ina surpussanza da l'Uffizi federal da sanadad. Las consequenzas sa mussian pir en l'avegnir. Ins vegnia a tegnair en egl il svilup.

En il Grischun han 31 813 votants votà per la lescha d'epidemias, 25 156 èn s'exprimids encunter.